



高去帆

20. 3. 1. 生

湖北禮山人

專科畢業

經歷／

軍訓教官

寄廬雜詩

古典詩組佳作

高去帆

春雨

野塘春水漲新痕
風雨時時一叩門
不為無家兼賦別
坐聽點滴到黃昏

溪聲

一夜清溪春水生
奔騰起聽未能平
人間已自傷繁響
何事啾啾更作聲

澄清湖觀魚

解得臨淵意 來尋湖上春
微風生碧浪 初日耀銀鱗
去住從心欲 浮沉且自親
相忘存一水 莊惠豈知津

有懷友人卻寄

野情端合偶閒鷗 到處雲山鎮暮愁
事去已無言可假 眼空惟覺意難酬
花枝照座驚回顧 柳絮迴風不自由
暫寄那堪成獨隱 年來世味淡於秋

僻居

僻居遠鬧市 移家就風竹
塵飛不到處 愛此清氣淑
七載絕奔競 繁華稀縱目
敞廬恰容身 差擬黃金屋
藜藿充飢腸 豈必定梁肉
退食足終老 不慕爵與祿
有山恣遊眺 有書供展讀
有酒堪怡情 有花散清馥
晚霞明遙峰 朝露溥草木
春採南山薇 秋餐東籬菊
心中寡滯慮 戶外少剝啄

一室任嘯傲 不知有寒燠
人生百年耳 歲月如轉轂
奄忽隨物化 未用長栗六
無為素絲悲 莫效歧路哭
憂傷凋朱顏 逝者去罔復
處世貴適意 何事苦微逐
兼善固可喜 窮宜慎守獨
今生詎可待 他生杳難卜
寶此一得愚 長歌自移穆